

## **BERITA POLIS HALANG KIBAR BENDERA PUTIH TIDAK BENAR**

**KUANTAN, 02 JULAI 2021:** Berita mengenai pihak polis menghalang 13 keluarga di Bukit Setongkol daripada mengibarkan bendera putih semalam adalah tidak benar.

Ketua Polis Pahang, YDH CP Datuk Ramli Mohamed Yoosuf berkata, laporan yang dikeluarkan tersebut adalah kurang tepat.

“Laporan itu agak kurang tepat. Polis tidak mengugut. Apa yang berlaku waktu itu, seperti dilaporkan KPD (Ketua Polis Daerah) Kuantan adalah kerana individu itu meletakkan bendera di tiang elektrik.

“Polis tiada halangan untuk bendera putih dikibarkan, kerana tidak ada dalam mana-mana peruntukan undang-undang atau SOP yang menyatakan perbuatan itu satu pelanggaran undang-undang setakat ini,” katanya di sini hari ini.

Beliau berkata, pihak polis tidak ada halangan untuk orang ramai mengibarkan bendera putih di mana-mana kawasan tetapi kemungkinan nasihat yang diberikan oleh pihak polis diterima sebaliknya oleh penduduk berkenaan.

“Tidak ada halangan daripada pihak polis sebenarnya. Kecuali mungkin dalam pada nasihat itu diterima sebaliknya.

“Saya telah mengarahkan supaya tidak ada apa-apa tindakan dibuat sekiranya bendera putih ini dikibarkan di tempat-tempat sepatutnya. Of course kalau menghalang lalulintas dan sebagainya ia adalah satu kesalahan. Tapi untuk tujuan mengibarkannya dan tidak menghalang dan sebagainya, tiada apa-apa halangan,” katanya.

Sebelum ini, telah tular berita mengenai “Mengangkat Bendera Putih Suatu Kesalahan” berkaitan sebuah keluarga yang mengangkat bendera putih sebagai tanda memerlukan bantuan di Jalan Bukit Setongkol yang mendakwa didatangi pihak polis dan pemimpin setempat yang memaksa mereka menurunkan bendera tersebut.

Penduduk mendakwa pihak berkuasa mengatakan tindakan penduduk mengibarkan bendera putih tersebut adalah satu kesalahan dan saman boleh dikeluarkan jika bendera yang dipasang gagal diturunkan.

Video kejadian itu tular di laman sosial selepas dimuat naik pengguna Facebook hingga mendapat pelbagai reaksi netizen. – **PAHANGMEDIA**

**Disediakan oleh Unit Komunikasi dan Media Pahang (UKOMP)**

**#MajuTerusPahang  
#Pahang1st  
#KerajaanNegeriPahang  
#PahangGo**

Oleh: Ain Nadhirah Basha

**(LIPUTAN BERGAMBAR)**

